

四庫全書

集部

欽定四庫全書

集部

湛然居士集卷一至三

詳校官中書_臣沈 颺

主事_臣呂雲棟覆勘

總校官編修_臣王燕緒

校對官編修_臣施培應

謄錄監生_臣王英紱

欽定四庫全書

集部五

湛然居士集

別集類四

元

提要

臣等謹案湛然居士集十四卷元耶律楚材撰楚材字晉卿遼東丹王八世孫金尚書右丞履之子從太祖平定四方太宗時官至中書令至順元年追封廣寧王謚文正事迹具元史本傳耶律或作移剌盖譯語之訛焦竑

經籍志以為兩人非也是集所載詩為多惟
第八卷第十三卷十四卷稍以書序碑記錯
雜其中編次殊無體例疑傳寫者亂之史稱
其旁通天文地理術數及二氏醫卜之說宜
其多有發揮而文止於斯不敵詩之三四意
者尚有佚遺歟然十四卷之數與諸家著錄
皆符或經國之暇惟以吟咏寄意未嘗留意
於文筆也王士禎池北偶談摘錄其贈李郡

王筆寄平陽開老和陳秀玉韻贈富察元帥
河中游西園壬午元日諸詩以為頗有風味
而稱其集多禪悅之語考僧行秀所作集序
稱楚材年二十七受顯訣於萬松盡棄宿學
其耽玩佛經蓋亦出於素習平水王鄰則曰
按元裕之中州集載右相文獻公詩又稱趙
閒閒為吾道主盟李屏山為中州豪傑知晉
卿學問淵源有自來矣故旁通詣極而要以

儒者為歸云云今觀其詩語皆本色惟意所
如不以研鍊為工雖時時出入內典而大旨
必歸於風教鄰之所云殆為能得其真矣乾
隆四十六年十二月恭校上

總纂官

臣紀昀

臣陸錫熊

臣孫士毅

總校官

臣陸費墀

欽定四庫全書

湛然居士集卷一

元 耶律楚材 撰

和黃華老人題獻陵吳氏成趣園詩

雪溪詞翰輝星斗紙蠹塵蒙詩一首湛然揮墨試續貂
囁嚅使人難出口丁年彭澤解官去遨遊三徑真三友
悠然把菊見南山暢飲東籬醉重九獻陵吳氏治荒園
成趣為名良可取養高不肯事王侯閒卧林泉了衰朽

今年扈從過秦川可憐尚有蕭條柳歸計甘輸吳子先
麗詞已後黃華手知音誰聽斷弦琴臨風痛想紗巾酒
嗟乎世路聲利人不知曾憶淵明否

和平陽王仲祥韻

一聖揚天兵萬國皆來臣治道尚玄默政簡民風純明
明我嗣君寬詔出絲綸洪波決四海聖訓宜書紳逆取
乃順守皇威輔深仁貪饕致天罰長吏求良循河表背
盟約羽檄飛邊塵聖駕親徂征將安億兆人湛然陪扈

從書劍猶隨身翠華次平水草木咸生春冰崑上新句
文質能彬彬冰雪相照映珠玉如橫陳詩筆居獨步唐
都一逸民聖政罔二三裁物惟平均綜名必核實求儒
務求真經術勿踈廢筆硯常可親竚待寰宇清園丘祀
天神選舉再開闢仲祥當超倫一旦騰達時獻策宜說
說

和李世榮韻

聖主題華旦熊羆百萬強兵行從紀律敵潰自奔忙百

谷朝滄海羣陰畏太陽黎民歡仰德萬國喜觀光堯舜
規模遠蕭曹籌策長巍然周禮樂盛矣漢文章神武威
兼德徽猷柔濟剛自甘頭戴白誤受詔批黃我道將興
起吾儕有激昂厚顏懸相印否德忝朝綱佐主難及聖
為臣每願良翠華來北闕黃鉞討南疆明德傳雙葉寬
仁洽萬方九州無不軌四海願來王兵革雖開創詩書
何可忘洪恩浮曉露嚴令肅秋霜符應千齡運功垂萬
世昌綿綿延國祚煜煜受天祥多士咸登用羣生無敗

戕此行將告老松菊未全荒

和李世榮見寄

雲橫北海西駟騎來天際梅軒真可人新詩遠相惠其
聲若良金其臭如芳蕙文艷理無華詞雄言不侈筆力
似黃山驚浪雲奔勢犀象牙角新蠶蜂銚尾細遙想醉
銜盃梅塢清陰翳閒散玉麒麟可得羈而繫吾子臥東
山誰治今之世好陳十漸書毋用六奇計萬里入龍庭
何須嘆迢遞時方涉大川舟楫須君濟

和李世榮韻

多謝梅軒不惜春聲詩來寄格清新詞源莫測波千頃
筆力能扛鼎萬鈞憂國心情常悄悄閒居容止自申申
誰知板蕩中原後瀟灑河東有若人

再用其韻

梅軒相別又三春別後文章與日新不分散材霑造化
好將幽隱入陶鈞我遊北海年垂老君臥南陽志未伸
遙想冰魂正無恙一枝迴寄隴頭人

又索六經

我愛平陽李世榮一番書史再鐫銘欲令吾子窮三傳
故向君家乞六經簡冊燦然新制度文章宛爾舊儀刑
莫教幼稚空相憶日日求詩到鯉庭

和耶律繼先韻三首

澤民我愧無術畧且著詩鴻慰離索詩書滿載升金山
絃歌不輟踰松漠世上原無真是非安知今是而非昨
連城美玉涅不緇百鍊真金光愈爍已悟真如匪去來

自然胸次絕憂樂斷夢還同世事空浮雲恰似人情薄
尚記吾山舊隱居松風蕭瑟松花落枕流漱石輕軒車
吟煙嘯月甘藜藿春山寂寂春溪深蕭條庭戶堪羅雀
而今不得安疎慵自笑條籠困鵬鶚勉力龍庭上萬言
男兒志不忘溝壑

其二

當年不肯讀三畧獨抱遺經伴閒索流行坎止不尤人
自甘萬里涉窮漠富貴榮華能幾時生死都來如夢昨

十年興廢漚浮沈百歲光陰電飛爍常笑梁鴻歌五噫
竊學榮啓彈三樂未能仁義戢干戈勉將敦厚懲澆薄
近有人從故隱來黃花無限開籬落問渠林肉與丘糟
奚如麥飯而羹藿又聞麋鹿滿姑蘇阿瞞不復遊銅雀
塗中曳尾希莊龜江夏沈舟悲禰鸛吾山佳處歸休乎
鹿逸平林魚縱壑

其三

祖道門庭元簡畧兒孫草裏添芒索擬心鷓子過新羅

起念白雲橫大漠迴殊四句有無中元非三際來今昨
大海纖塵一點飛洪爐片雪寒光爍寧論業障本來空
半偈徒誇寂滅樂細切清風非異事更將明月剗來薄
玲瓏四面亦無門充塞十方絕壁落羅列珍羞渠不食
癡人猶自貪藜藿祇圖龍領摘明珠誰知虎口存活雀
坐脫猶迷一色邊崎嶇鳥道一作去路橫秋鶚可笑人間荆
棘林死者填溝空塞壑

和薛伯通韻

滴滴秋光溢遠山
穹廬寥落酒瓶乾

一作塞天空
濶鴈聲乾

詩章

平淡思居易
禪理縱橫憶道安
不分西風霜葉脫
難禁秋雨菊花殘
閭山舊隱天涯遠
夢裏思歸夢亦難

鹿尾

鑾輿秋獵獵
南岡鹿尾分甘賜
上方濃色殷殷紅
玉髓微香馥馥紫
瓊漿韭花酷辣同
葱薤芥屑差辛類
桂薑

何似羶根蘸濃液
邀將詩客大家嘗

一作流匙滑
針大家嘗

過金山用人韻

雪壓山峰八月寒羊腸樵路曲盤盤千巖競秀清人思
萬壑爭流壯我觀山腹雲開嵐色潤松巔風起雨聲乾
光風滿貯詩囊去一度思山一度看

過雲中贈別李尚書

誰識雲中李謫仙詩如文錦酒如川十畝良園君有趣
一廛薄土我無緣舊恨常來春夢裏新吟不到客愁邊
明朝分手天涯去他日相逢又幾年

和裴子法韻

頃觀子法跋白蓮社圖斥淵明攻乎異端
吾子不惑所學主張名教真韓孟之儔亞
也昔巢由避天下而遠遁堯舜受天下而
不辭以致澤施于萬世名垂于無窮是知
潔已治天下各有所安耳夫清虛玄默樂
天真而自適者也焦勞憂勤濟蒼生為已
任者也二道相反甚于冰炭使堯舜巢由
易地則皆然後之世亂臣賊子窺伺神器

狐媚孤兒寡婦扼其喉以取天下者聞巢
由之風亦少知媿矣然則巢由之功豈可
少哉棄享天下之大樂而且希物外之虛
名者豈人情也耶文中子有言虛玄起而
晉室亡斯豈莊老之罪歟盖用之不得其
宜也以虛玄之道治天下其猶祁寒御單
葛大夏服重裘自底斃亡豈裘葛之罪哉
昔晉武一統之始不為後世之遠謀何曾

已識之既而禍難繼作骨肉相殘屠戮忠
良進用讒佞雖元凱復生亦不能善其後
矣大厦將頽非一木所能支獨淵明何能
救其弊哉適丁天地不交萬物不通君子
道消小人道長之時淵明見幾而作掛印
綬而歸結社同志安林泉之樂較之躁進
苟容于小人之側者何啻九牛一毛耶以淵
明之才德假使生于堯舜湯武之世又安

知不與臯夔伊周並驅爭先哉宣尼有云
用之則行舍之則藏又云進退存亡不失
其正者其惟聖人乎斯亦名教之內昭昭
可考者也何責淵明之深也余嘗謂否則
卷而懷之以簡易之道治一心達則擴而
充之以仁義之道澤四海實古今之通誼
也因用子法遊姑射元韻以見意云

達摩一派未西來無限勞生眼未開六朝繁盛已矣耳

兩晉風流安在哉自笑中書老僕射

引韻借此字

事佛竊效

王安石公案翻騰舊葛藤林泉准備閒蹤跡用之勲業
垂千秋發揚孔孟誰為儔舍之獨善樂真覺賦詩舒嘯
臨清流豈止淵明慕松菊晉室高賢十八九君子道消
小人用貞夫遠棄利名酒蘇黃冠世能文詞裴張二相
名當時祖道禪林恣遊戲堯風舜德甘噓吹達人不為
造物役打破東西與南北毛吞巨海也尋常出沒縱橫
透空色真如頗與犧易同不動確乎無吉凶湛然信筆

書寢語臨風遠寄綠野翁贈君一句直截處祇要教君
能養素但能死生榮辱哀樂不能羈存亡進退盡是無
生路

和許昌張彥升見寄

真人休運應千載生知神武威中邦杜絕奇技賤異物
連城玉斗曾親撞兵出潼關渡天塹翠華雜映騶虞幢
生民歌舞嘆奚後壺漿簞食轅門降偏師一鼓汴梁下
邏騎飲馬揚子江良臣自有魏鄭輩死諫安用干與逢

少微昨夜照平水清河國士真無雙壯歲遊學力稽古
孜孜繼晷焚蘭缸新詩寄我有深意再三舒卷臨幽窗
安得先生贊王室委倚奚憂庶政厖堪笑紛紛匹夫勇
徒誇巨鼎千鈞扛何日安車蒲輪詔公入北闕蒲萄佳

醞爛飲玻璃缸

西人蒲萄釀皆貯以玻璃瓶

和南質張學士敏之見贈七首

桃源劉鳳樓蕭鐫冰斲玉哦通宵珠璣錯落照蘭室龍
蛇偃蹇蟠霜綃和我新詩使予起却得瓊瑰酬木李邊

城十載絕知音琴斷七絃鶴亦死而今得識君姿容胸
中鬱結渙然空詩壇君可據上位筆力我甘居下風筆
陣文場寬且綽馳騁看君能矍鑠學海波瀾千頃陂厭
飫經書爛該博幾時把手瀟湘邊生涯自有壺中天鳴
榔一笑舟浮蓮滄波萬里凝蒼煙

其二

漏沈沈竹蕭蕭蒲團禪定坐終宵古廟香爐無氣息一
條白練如瓊綃性海澄澄波不起宛似冰壺沈玉李庸

人泥教不知歸七竅鑿開混沌死雖云至道絕音容不
離幻有成真空百尺竿頭更移步普天匝地生清風大
用全提自寬綽裨將交鋒何矍鑠醒時呼起夢中人徧
濟含生其利博本無內外與中邊踏破威音劫外天汚
泥深處種青蓮昇平世界沈烽煙

其三

雨蕭蕭風蕭蕭對牀談道徹清宵欲畫太虛無面目慎
無落筆汚冰綃人間平地風波起反笑於陵噉糟李富

貴榮華都幾時迷者孰能死前死須彌芥子云相容神
通妙用不空空劫火洞然渠不壞紙鳶能禦毗藍風龍
象騰驤何綽綽迴視駕駘空矍鑠悟時一語透塵沙安
用才學恃宏博維摩方丈傍無邊箇中無礙散花天迴
途穩穩步雙蓮得玄鳥道橫晴煙

其四

院深深籟蕭蕭伽陀舒卷度蘭宵若解荷心繫珠露便
能天外裁雲綃大覺空生一漚起悟斯獨有屏山李

屏山

居士李之純嘗作疏
楞嚴別解為禪客重

參透楞嚴第一機方信庵中人不

死个裏家風針不容夢回六趣大千空道人受用本無

盡明月薄則細切風香象朋從威綽綽獨跳狂獐空矍

鑠悲心起處了無私濟渡塵沙恩廣博不涉中流離兩

邊下無大地上無天無人無佛臺無蓮萼萼碧草生芳

煙

其五

雲飄飄水蕭蕭一燈香火過閒宵神清半夜不成夢書

帷風細揚微綃運應昌期王者起自愧文章輸杜李竊
同居易了無生誰羨葛洪學不死一榻蒲團膝足容脩
然丈室塞虛空翻騰密藏明佛日淘汰機緣振祖風丹
鳳沖霄何綽綽失曉猷郎徒矍鑠人間取捨本千差世
路窮通如六博幽人嘯咏水雲邊劫外光風自一天閒
來石上栽紅蓮水無波浪火無煙

其六

風蕭蕭雨蕭蕭蕭蕭風雨悲涼宵籬菊殘英漬黃玉林

風脫葉飄紅綃幽人輾轉凌晨起邂逅門前逢短李殷
衰聞道有三仁欲說九疇君不死穹廬相語為從容懸
河雄辯能談空風神蕭散野鶴立照人玉樹臨秋風落
筆新詩一揮綽不似武人誇矍鑠銀鈎筆力掩二王照
夜連城肯輕博他年相約秋山邊秋江一派連秋天閒
聽菱女歌採蓮輕舟一醉眠秋煙

其七

衣龍鍾鬢飄蕭穹廬停燭坐寒宵翰林遣介贈佳句薑

芒鳥跡書生綃既倒狂瀾再扶起昔有謫仙元姓李今
日龍庭忽見君誰道當年太白死文章氣象難形容騰
龍翦鳳遊秋空筆力萬鈞神鬼泣雷轟電掣驅疾風餘
裕喜君能綽綽鼓舞為君子矍鑠解讀奇字笑揚雄識
壓張華能物博與君握手天山邊舉觴相屬望青天他
年雅社結白蓮林泉杖屨衝雲煙

和張敏之鳴鳳曲韻

寫蛟螭咳珠璣英姿元揀

一作占

碧梧棲彬彬文彩自光

輝有材希晉用失志欲劉依薦君誰肯借噓吹洪才大
筆識君稀鯤遊翻海震鵬舉翥天飛問渠蟾窟攀仙桂
何似冥山破鐵圍人間強認假生死世上本無真是非
濃歡殢春夢晚景嘆殘暉夢斷日沈真可笑輸却禪人
向上機遮眼開經卷蒙頭壞衲衣息念融凡聖無心應
順違震風威橫擔柳標萬山歸

和孟駕之韻

平陽聞有鄒人孫封書上我近萬言討論墳典造極致

商摧古今窮深源文章高出蘇黃輩英雄不效秦儀志
志圖仁義濟元元冀北無雙瑚璉器淪落塵埃德不孤
梅軒結友天一隅我惜鹽車困騏驎騰驤未得踏亨塗
甕牖繩樞甘儉薄詩腸雷轉充糟粕他日佳聲聞九天
富貴之來不得却丁年黃卷樂平生鄉閭一諾千金輕
滄浪清處閒濯纓才名高價如連城筆下有神詩有眼
五車書史窮編簡一舉高登甲乙科曾對閭闔持手版
天兵一鼓下睢陽旌旗整整陣堂堂玉石俱焚君子隱

北渡來依日月光
徒步黃塵千里遠
猶抱遺經究微婉
天產昂藏一丈夫
三十未遇非為晚
聞望卓冠儒林叢
燦然星宿羅心胸
馳驟大方孰並駕
絕塵奔逸其猶龍
君似昆吾玉可切
昆吾不是尋常鐵
利穎神鋒人未知
寶匣空閒三尺雪
何時搜出蟄龍鞭
一聲霹靂轟青天
歲旱須君作霖雨
拔茅進用其茹連
天子明堂求國棟
鵬飛全藉天風送
鳳池波暖百花新
詠游不作江湖夢

和陳秀玉縣梨詩韻

石門九月西風高

梨出於石門之北遵化縣

縣梨萬樹金垂梢清谿

秀玉道號也

千里遺贈我籐筐初發香盈包謫仙風度清谿

亞春風曾飲梨花下不用紅粧唱採蓮醉望青天歌二
雅我有斗酒清且醇同君薦此鵝黃新初見分香剖金
卵更看削玉飛霜鱗縹葉紫條何足語夜光安可同魚
目文園塵渴正難禁咀嚼冰雪剗香玉

和冀先生韻

東垣士大夫以興王聖德詩見寄用酬雅

意

運出三爻兌

以太乙推之而得

龍飛九五乾要荒歸化育豪哲

入陶甄有幸恩涵海無私德應天偏師收百越一鼓下

三川天子能身正元戎不自賢重光道同軌累聖德相

聯策決九重內功歸萬乘權羣雄哀稽顙多士喜磨肩

輔弼規左右承疑贊後前開夷逾漢武平叛跨周宣冠

帶通窮域車書過古坻覽幾雲母障受諫翠華輶款塞

諸蠻洞來朝百濟船降王趨陞闕強虜列氓編淨掃妖

氛變潛消烽火煙詞臣遊館閣幽隱起林泉堯舜文明
盛商姬禮樂全九成合古奏二雅詠新篇世卜千年世
年斯億萬年宗親成蒂固國祚等瓜綿聖政興人頌天
威萬古傳勉旃封禪事不用策安邊

湛然居士集卷一

欽定四庫全書

湛然居士集卷二

元 耶律楚材 撰

和百拙禪師韻

十方世界是全身氣宇如王絕比倫與奪機中明主客
正偏位裏辨君臣眠雲臥月辭三島鼓腹謳歌預四民
了了時誰可曉閒人元不是閒人

題平陽李君實吟醉軒

古晉君實世所知幽軒佳號兩相宜長鯨海量嫌甜酒
彩筆天才厭小詩七步賦成文燦爛千鍾不惜錦淋漓
一作千鍾飲徹何當杖屨遊平水得預君家吟醉時

從聖安澄老借書

湛然寢語寄西堂此箇因緣果異常陽老十門剛結案
欽公五派強分贓劒逢劒客須拈出詩遇詩人何必藏
居士病多諳藥性聖安得效不傳方

題西菴所藏佛牙二首

殷勤敬禮辟支牙緣在西菴居士家
午夜飛光驚曉月
六時騰焰燦朝霞
一番頂帶因初結
七轉生天果不差
庸士執方猶未信
防風安得骨專車

又

旃檀奩裏貯靈牙
來自中天尊者家
瑩色冷侵秋夜月
真光明射晚晴霞
本同舍利元無別
疑是金剛事有差
猶憶廣長舌
左右咀嚙風雨震雷車

和耶律繼先韻二首

舊山盟約已愆期一夢十年盡覺非瀚海路難人去少
天山雪重鴈飛稀漸驚白髮寧辭老未濟蒼生曷敢歸
去國遲遲情幾許倚樓空望白雲飛

又

不事王侯懶屬文時危何處覓元勲他年收拾琴書去
笑傲林泉我與君

過陰山和人韻

陰山千里橫東西秋聲浩浩鳴秋溪猿猱鴻鵠不能過

天兵百萬馳霜蹄萬頃松風落松子鬱鬱蒼蒼映流水
天丁何事誇神威天台羅浮移到此雲霞掩翳山重重
峰巒突兀何雄雄古來天險阻西域人煙不與中原通
細路縈紆斜復直山角摩天不盈尺溪風蕭蕭溪水寒
花落空山人影寂四十八橋橫鴈行勝遊奇觀真非常
臨高俯視千萬仞令人凜凜生恐惶百里鏡湖山頂上
旦暮雲煙浮氣象山南山北多幽絕幾派飛泉練千丈
大河西注波無窮千溪萬壑皆會同君成綺語壯奇誕

造物縮手神無功山高四更纔吐月八月山峰半埋雪
遙思山外屯邊兵西風冷徹征衣鐵

其二

羸馬陰山道悠然遠思寥青巒雲靄靄黃葉雨蕭蕭未
可行周禮誰能和舜韶嗟吾浮海粟何礙八風飄

其三

八月陰山雪滿沙清光凝目眩生花插天絕壁噴晴月
擎海層巒吸翠霞松檜叢中疏畎畝藤蘿深處有人家

橫空千里雄西域江左名山不足誇

其四

陰山奇勝詎能名斷送新詩得得成
萬疊峰巒擎海立千層松檜接雲平
三年沙塞吟魂遯一夜氍毹客夢清
遙想長安舊知友能無知我此時情

再用前韻

河源之邊鳥鼠西陰山千里號千溪
倚雲天險不易過
驕驍踞蹙追風蹄
簽記長安五陵子
馬似遊龍甲如水

天王赫怒山無神一夜雄師飛過此盤雲細路松成行
出天入井實異常王尊疾驅九折坂此來一顧應哀惶
崢嶸突出峰峭直山頂連天纔咫尺楓林霜葉聲蕭騷
一鴈橫空秋色寂西望月窟九譯重嗟乎自古無英雄
出關未盈十萬里荒陬不得車書通天兵飲馬西河上
欲使西戎獻馴象旌旗蔽空塵漲天壯士如虹氣千丈
秦皇漢武稱兵窮拍手一笑兒戲同塹山陵海匪難事
剪斯羣醜何無功騷人羞對陰山月壯歲星星鬢如雪

穹廬輾轉清不眠霜匣閒殺昆吾鐵

復用前韻唱玄

天涯流落從征西寒盟辜負梅花溪昔年學道頗得趣
魚兔入手忘筌蹄殘編斷簡披莊子日日須當誦秋水
誰知海若無津涯河伯源流止於此人間醬在紙數重
太玄強草嗤揚雄高臥蒿萊傲唐室清風千古獨王通
曲者自曲直者直何必區區較繩尺一筆劃斷閒是非
萬事都忘樂岑寂功名半紙字幾行競羨成績書太常

只知牢筴饗芻豢不思臨刃心悲惶何如打坐蒲團上
參透昇平本無象一餅一鉢更無餘容膝禪菴僅方丈
從教人笑徹骨窮生涯元與千聖同鳥道雖玄功尚在
不如行取無功功歸來踏破澄潭月大冶洪爐飛片雪
且聽石女鳴巴歌萬里一團無孔鐵

用前韻送王君玉西征二首

湛然送客河中西

西域城名也

乘興何妨過虎溪清茶佳果

餞行路遠勝濁酒烹馳蹄結交須結真君子君子之交

淡如水一從西域識君侯傾蓋交歡忘彼此當年君臥
東山重守雌默默元知雄五車書史豈勞力六韜三畧
無不通詩詠珠璣無價直青囊更有琴三尺奉命西來
典重兵不得茅齋樂真寂魚麗大陣兵成行行師布置
非尋常先生應詔入西域一軍駭異皆驚惶武皇習戰
昆明上欲討昆明致犀象吾皇兵過海西邊氣壓炎劉
千萬丈先生一展才畧窮百蠻冠帶文軌同威德洋洋
震天下大功不宰方為功隱居自有東山月風拂松花

落香雪退身參到未生前方信秤鎚元是鐵

其二

先生應詔將征西湛然送客涉深溪徘徊一舍未忍去
兵車暫駐天駒蹄猶憶今春送君子桃李無言映流水
寒暑推遷奈老何秋風革律重來此關山險僻重復重
西門雪恥須豪雄定遠奇功正今日車書一混華夷通
先生純德如矢直詎為直尋而枉尺功成莫戀聲利場
便好回頭樂玄寂故山舊隱松千行奇峰怪石元異常

前日盟言猶在耳猿鶴思怨空悲惶我擲直鉤魚不上
須信遊鱗畏龍象冥鴻一舉騰秋空誰羨文章光萬丈
道兮人作非天窮區區何必較異同語默行藏在乎我
退身奚論無成功安東幸有閭山月萬頃松風萬山雪
收拾琴書歸去來修心須要金成鐵

用前韻感事二首

稱斤甘薺賣京西誰信無人採五溪鵬異衆禽全六翮
麟殊凡獸具五蹄昔年學道宗夫子盈科後進如流水

蟄龍猶未試風雷萍泛蓬飄而至此縕袍甘分百結重
不學亂世姦人雄忘憂樂道志不窮守窮待變變則通
歲寒松栢蒼蒼直摩雲直待萬千尺桃李無言蹊自成
此君冷淡人何寂生平恥與噲伍行杜門養拙安天常
澤民致主本予志素願未酬予恐惶否塞未能交下上
何日亨通變爻象不圖廊廟為三公安得林泉參百丈
居士身窮道不窮庸人非異是所同筆頭解作萬言策
人皆笑我勞無功流落遐荒淹歲月贏得飄蕭雙鬢雪

謀生太拙君勿嗤不如嗣宗學鍛鐵

其二

金烏日日東飛西滔滔綠水流長溪流波一去不復返
逐日恨無八駿蹄窮理達生獨孔子嘆夫逝者如斯水
歲不我與其奈何兩鬢星星尚如此曩時鑿破藩垣重
澤民濟世學英雄風雲未會我何往天地大否途難通
霜匣神劍蒼龍直切玉如泥長數尺利器深藏人未知
豐城埋沒神光寂讀書一目下數行金石其心學王常

學術忠義兩無用道之將喪予憂惶有意攀龍不得上
徒勞牙角拔犀象惟思仁義濟蒼生豈為珍羞列方丈
簞瓢陋巷甘孤窮鴻鵠安與燕雀同天與之才不與地
反令豎子成其功安得光明依日月功名未立頭如雪
問君此錯若為多使盡二十四州鐵

過濟源和香山居士韻

覃懷勝遊地濟瀆垂名久忽見樂天吟笑我輸先手麗
詞金玉振老筆風雷走乘興試續貂啓我談天口平湖

湧泉注清涼瑩無垢憑檻瞰連漪風髯塵抖擻龍孫十
萬竿翦翳濃陰厚沁水濟源東天壇王屋右秀色已可
食何須杜康酒步步總堪詩佳篇如素有賡酬淡相對
獨有龍岡叟亭上幾徘徊斜陽西入酉晚年歸意切對
此空沈首何日遂初心營居碧林後

一作翠林

和裴子法見寄

人生都幾何半被功名役一旦燕山破西行過千驛顛
沛不違仁先難而後獲鵲鵲捐腐鼠烏鳶其勿嚇尾從

出天山從容遊大石琴書澹相對尚未忘丘索前歲入
關中戈兵克商號明詔典蘭省自愧承深責秦隴成劫
灰京索空陳迹長河尚濁流南山自濃碧把酒酌青天
興亡弔今昔長安非衣君壯年學問積天上玉麒麟英
才可珍惜詩魂素月高飲量滄溟窄清談咳珠玉便腹
筭經籍服君百韻詩謝子萬言策易道已變屯世又當
應革淮陰正虛襟左車宜籌畫須要蓮峰手乾坤再開
闢昂藏綠野翁真我龍門客

用李德恒韻寄景賢

牢落十年扈御營
瑤琴忘盡水仙聲
酷思詩酒閒中樂
見說干戈夢裏驚
林下因緣千古重
人間富貴一錢輕
此身未退心先退
獨有龍岡識我情

過天德和王輔之四首

天縱吾君大聖人
天兵所指弭煙塵
三齊電掃何須颺
六國雷驅不用秦
誅佞未聞曾請劍
劾姦誰肯試埋輪
黃扉伴食空無補
自笑龍鍾一老臣

其二

六師嚴駕渡長河師不留行誰敢何千里旌旗翻錦浪
一聲金鼓震寒波殷亡誰道三仁在康滅空傳五子歌
唾手要荒歸一統漢唐鴻業未能過

其三

積年叨祿領台司位重才微甚不宜地上流錢慚晏算
樽前決勝愧良帷過情聲聞傳人口似直愚忠結主知
三徑荒涼松菊在他時舍此復何之

其四

愁老先生本素臣
洪才大筆力千鈞
沽名不築傳巖版
賈世誰垂渭水綸
舟泛五湖希范蠡
腰懸六印笑蘇秦
韋編三絕耽羲易
蕭散風神真隱人

槐安席上和張梅韻

甘薺五溪人不採
兩京高價賣秤斤
君方淪落羞看我
我亦飄零懶問君
人遠空殘眉上黛
愁深不整鬢邊雲
誰憐古戍寒窗下
新樣梭成織錦文

思親有感二首

遊子棲遲久不歸
積年溫清闕慈闈
囊中昆仲親書帖
篋內萱堂手製衣
黃犬不來愁耿耿
白雲空望思依依
欲憑鱗羽傳安信
綠水西流鴈北飛

其二

伶仃萬里度西陲
壯歲星星兩鬢絲
白鴈來時思北闕
黃花開日憶東籬
可憐遊子投營晚
正是孀親倚戶時
異域風光恰如故
一銷魂處一篇詩

思友人

落日蕭蕭萬馬聲
東南回首暮雲橫
金朋蘭友音書絕
玉軫朱絃塵土生
十里春風別野店
五年秋色到邊城
雲山不礙歸飛夢
夜夜隨風到玉京

贈李邵王筆

管城從我自燕都
流落遐荒萬里餘
半札秋毫裁翡翠
一枝霜竹剪瓊琚
鋒端但可題塵景
筆下安能畫太虛

聊復贈君為土物
中書休笑不中書

李邵王嘗為
西遼執政

寄雲中臥佛寺照老

像教中微祖意沈盧能滴子起予深看經不怕牛皮透
公見閨藏教故云著眼嘗聽露柱吟行道權居臥佛寺活機特
異死禪心憑君摘取空華實好種人間無影林

寄平陽淨名院潤老

昔年平水便相尋握手臨風話素心刻燭賦成無字句
按徽彈徹沒絃琴風來遠渡晚潮急雨過寒塘秋水深
此樂莫教兒輩覺又成公案滿叢林

贈雲川張道人

雲川道士有詩聲刻篆雕蟲醉未醒素扇自甘贖碧笠
因西人奪笠渠以扇贖之故云玄鶴不肯換黃庭春秋榮悴悲椿木晦

朔生凋笑瑞蕤何似擴開真日月區區爝火任熒熒

贊李俊英所藏觀音像

白衣大士足威神蓮智興悲詎可陳金色界中垂萬臂
碧蓮花上露全身鎮州鑄就金難似天竺鐫來玉未真
不識觀音真面目燕吟鶯語過殘春

題西菴歸一堂

搏霄元帥築西庵于廳事之隅以舍沙門建
歸一堂置三聖廟貌屏山居士有云卷波瀾
于聖學之域徹藩籬于大方之家其搏霄之
謂乎偶得亂道韻詩錄呈諸士大夫幸希光
和
仍請西庵上人書之楹棟間為他時林下清話張
本云

三聖真元本自同隨時應物立宗風
道儒表裏明墳典

佛祖權真透色空曲士寡聞能異議達人
大觀解相融
長沙賴有蓮峰掌一撥江河盡入東

和景賢還書韻二首

居士今年又出關琴書真味伴予閒
簡成草畧初無意
語闕擇治誤犯顏漆水自慚貽口實
龍岡却得破詩慳
衰翁幸乞贖前過一炷清香論八還

其二

淵明幽隱掩柴關琴已亡絃人亦閒
靜倚書窗獨寄傲

笑觀庭樹自怡顏
五音格外聲何限
百草頭邊法不慳
蠹譜斷絃無用處
因風得得寄詩還

景賢索絃譜
故有是句

外道李浩求歸再用韻示景賢

自從一箭透重關
觸處忘緣觸處閒
莫問羔裘橫毳衲
從教華髮映蒼顏
水聲說法起予甚
山色呈機不我慳
寄客天涯樂如許
問渠何必更南還

外道李浩和景賢霏字韻予再和呈景賢

塵緣劃斷已忘機
布鼓徒敲和者稀
中隱強陪人事過

禪心不與世情違昔年勲業真堪笑舊日家山懶欲歸
我愛北天真境界乾坤一色雪花霏

和楊居敬韻二首

自愧才疏草芥微偶然千載遇明時惟希一統王家義
何暇重思晁氏危仁義且圖扶孔孟縱橫安肯傲秦儀
行看堯舜澤天下萬國咸寧庶績熙

其二

詔下龍庭萬國歡野花啼鳥總欣然熙朝龜卜符千億

聖主龍飛第一年至道變通皆有數浮生富貴本由天
誰人得似楊公子傲世高吟數百篇

過天寧寺用彥老韻二首

十年不得舞衣斑行盡天涯萬里山黃閣伴食空皓首
蒼生未濟漫胡顏新朝兵革征方急舊隱煙霞尚未還
衮衮簿書塵滿眼衰翁奚暇謁松關

其二

今日從征亦偶然天寧遐想思懸懸貪榮不得還山去

須信衰翁未若賢

過天山周敬之席上和入韻二首

淪落天涯數十秋
區區班筆早年投
採薇山下慵拈草
洗耳溪邊懶飲牛
振武揚威難射虎
忘機絕慮不驚鷗
當年射策承明殿
未必輕輕輸呂籌

其二

憩馬居延酒半醺
寂寥寒館變春溫
未能鵬翼騰溟海
不得鴻音過鴈門
千里雲煙青塚暗
一天風雪黑山昏

天涯幸遇知音士仔細論文共一樽

和人韻

四海皇皇無所歸夢魂常遶故園飛
海山不羨學居易華表留言笑令威
毛落難尋蘇子節囊空猶有老萊衣
靜思二十年間事擾擾紛紛盡覺非

丁亥過沙井和耶律子春韻二首

科登甲乙戰文闈吾子才名予獨知
策許身心君易樂蕭曹勲業我難為
有恒得見實無憾知己相逢未忍離

攜手河梁重話舊胡然羞和子卿詩

其二

行藏俯仰且隨時被褐懷珠人未知
燕雀既羣難立志鳳凰不至擬胡為
可嗟世態頻更變何奈人生多別離
莫忘天山風雪裏湛然駝背和君詩

余昨至沙井乘牛車過前路跨駝方

達行在偶得隔句一聯云牛車馳傳頗異相如駟馬車馳背吟詩不似竹林七賢畫因有是句

再過晉陽獨五臺開化二老不遠迎

高岡登陟馬玄黃落日西風過晉陽
道士歡迎捧林果

儒冠遠迓挈壺漿五臺強健頭如雪開化輕安鬢未霜
誰會二師深密意趙州元不下禪牀

過清源謝汾水禪師見訪

汾水禪師箇裏人杖藜尋我過清源半盂紅果情何厚
一盞清燈話細論山水景中君得意兵戈隊裏我銷魂
他年相約雲深處松竹蕭蕭靜掩門

王屋道中

勝克河中號令齊神兵入自太行西昏昏煙鎖天壇暗

漠漠雲埋王屋低風軟却教冰泛水

一作冰
解凍

寒輕還使

雪成泥行吟想像覃懷景多少梅花坼玉溪

湛然居士集卷二

欽定四庫全書

湛然居士集卷三

元 耶律楚材 撰

和解天秀韻

猛士彎弓挽六鈞長驅下汴政施仁前朝運謝山河古
聖世時亨雨露新未遇自甘焚綠綺知音不必惜陽春
朝廷將下搜賢詔莫戀煙霞老此身

用萬松老人韻作十詩寄鄭景賢

羶廬同抵足談道月西沈
議論馨香發文章蘊藉深
正便邊氏腹不上謫仙襟
自得逍遙意何須泊鄧林

其二

豐城三尺劒神器尚埋沈
確論穿楊的生機劈筭深
天真貯便腹浩氣塞征襟
竚看澤天下清風冠士林

其三

破船無滲漏流水不能沈
露鎖青山秀花藏古徑深
白雲陪野興晴月洗煩襟
絕後重甦息飛花枯木林

其四

隱隱三星出依依片月沈
鶴飛遼海濶猿嘯楚山深
柳色雲霓袖蘆花雪滿襟
普天秋意露一葉墜梧林

其五

玄珠羅帳密寒鼎篆煙沈
翡翠疎簾隔琉璃古殿深
本來無垢體何必拂塵襟
斫却蟾中桂方成般若林

其六

鼈餌不須針聊將玉線沈
須彌猶未大渤海豈為深
悟

後牛穿鼻迷時馬有襟
弋人何所慕幽鳥在高林

其七

箇事不容針迷途自陸沈
西天三步遠東海一盃深
涼月盛玄鉢輕雲翦素襟
曹溪無一滴波浪沸禪林

其八

流波無放蕩死水暮平沈
機盡方鉤隱綸空正釣
深赤心休借口青
眼好開襟誤捉溪中月
人人似翰林

其九

夢覺方知錯生平自屈沈滌塵千澗外遺照亂松深柳
帶縫穿屣荷衣綴破襟寂寥選佛味何似宴瓊林

其十

漁家何足好乘興一鉤沈路僻蒼苔滑舟橫古渡深小
晴掀箬笠微雨整蓑襟夢斷知何處寒潮沒晚林

萬松老人真贊

昔無盡居士題恒嶽廟云聰明厭血食悔不
值元珪茲因恒州四衆敦請萬松老師師不

行且以頂相付之門弟湛然居士再拜而贊
之曰

每恨恒山不逢珪老四衆同緣萬松親到

萬松老人琴譜詩一首

萬松索琴并譜予以承華殿春雷及種玉翁悲風
譜贈之

良夜沈沈人未眠桐君橫膝叩朱絃千山皓月和烟靜
一曲悲風對譜傳故紙且教遮具眼聲塵何礙汚幽禪

元來底許真消息不在絃邊與指邊

寄曲陽戒壇會首大師

四衆飛書請萬松不消彈指已成功
燈籠證據真談辨露柱承當不耳聾
梵行細推無處所戒壇須信塞虛空
無為濟物誰能悉惟有東垣月拂風

和王巨川韻

聖駕徂征率百工貔貅億萬入關中
周秦氣焰如雲變唐漢繁華掃地空
灞水尚存官柳綠驪山惟有驛塵紅

天兵一鼓長安克千里威聲震海東

釋奠

王巨川能於灰燼之餘草創文宣聖廟以己丑
二月八日丁酉率諸士大夫釋而奠之禮也諸
儒相賀曰可謂吾道有光矣是日四衆奉迎釋迦
遺像行城歡聲沸沸僕皆頂其禮作是詩以見
意云

多士雲奔奠上下釋迦遺像亦行城旌幢錯落休迷色

鐘磬鏗鏘豈在聲宣父素心施有政能仁深意契無生
儒流釋子無相諷禮樂因緣盡假名

和耶律子春見寄

四海皇皇足俊賢浪陪扶日上青天且圖約法三章定
寧羨浮榮六印懸潤色吾儒惟恐後扶持天下敢為先
過情聲聞予深恥可笑虛名到處傳

其二

生遇干戈我不辰十年甘分作俘臣施仁發政非無據

論道經邦自有人聖世規模能法古舊汚習染得惟新
英雄已入吾皇彀從此無人更問津

其三

且喜朝廷先正名林泉隱逸總公卿羣雄一遇風雲會
萬國咸觀日月明丹鳳固應潛亂世白麟自合出升平
佇看一作快北闕垂溫詔前席求賢進賈生

其四

舉世寥寥識我誰未操弓矢愧由基衰年有幸彈三樂

盛世無才出六奇棄物且有光海量散才獲用荷天私
微臣自忖將何報信筆裁成頌德詩

其五

邂逅沙城識子初天山風雪醉吟餘文章光焰君堪羨

節操儀刑我不如麴蘖鄉中前進士

渠有詩云老去惟
耽麴蘖春故有是

句風波堆裏老中書他年歸去無相棄同到閭山舊隱
居

寄耶律國寶

昔年萍迹旅京華，曾到風流國寶家。
居士為予常喫素，先生愛客必烹茶。
明窗揮麈談禪髓，淨几焚香頂佛牙。
回首五年如一夢，夢中不覺過流沙。

公所藏佛牙甚靈異

寄景賢一十首

龍岡能覓淡中歡，心與孤雲自在閒。
琴阮生涯事松菊，詩書活計老丘山。
叩絃聲自無中出，得句詩從天外還。
踏破化工無盡藏，閒人受用亦非慳。

其二

龍岡漆水兩交歡縱意琴書做老閒未得一言安海內
已輸三箭定天山肯容詩思妨心慧豈使聲塵礙耳還
信手拈來無不是清風明月有何慳

其三

人間聚散妄悲歡何似林泉遯世閒十載殘軀遊瀚海
積年歸夢遶閭山先人舊隱居也空宮猿鶴招予往滿架琴書
伴我還多謝龍岡憐老隱新詩酬酢路無慳

其四

絃索詞章且助歡羨渠臨老得安閒琴歌愛子彈秋水
詩句服君仰泰山聲古調淒真可聽辭雄韻險實難還
先難後易今方省居士襟懷本不慳

其五

宦情觸處不成歡未得浮生半日閒薦鶚有書慚北海
澤民無術愧東山琴書習氣終難忘宮麓荒園怎得還
卜隱龍岡成老伴肯教詩思筆頭慳

其六

廣文憐我失清歡
每著琴書伴我閒
痛憶金聲并玉振
酷思流水與高山
詩壇各啻猶深閉
琴債遷延未肯還
一狀如今都領過
龍岡須破兩重慳

其七

琴書吾子盡幽歡
隨分消磨日月閒
佳句典刑傳四海
水仙聲韻徹三山
每慚木李投君去
却得瓊瑤報我還
從此龍岡開廩藏
徽邊筆下更無慳

其八

世間何事最為歡，爭似能偷忙裏閒。
得遇夜晴須對月，每逢春盛強登山。
無錢沽酒和衣典，一作和圖利吟詩
倍本還。綺語千章，琴百曲，莫教風月笑人慳。

其九

我與先生久已歡，而今皆願老來閒。
同舟載棹醉觀月，並轡騎驢飽看山。
綺句綴成連譜，換純音彈了著詩還。
琴詩此際慵拈出，可怨龍岡為紙慳。

其十

閒人閒裏竟閒歡未得迴光未是閒叩道一螺斟巨海
參玄千里望恒山但能透鏃穿三句何必拖泥辨八還
箇事人人皆富有含生休怨釋迦慳

和景賢韻三首

龍岡便腹盡詩書落筆雲煙我不如一紙安書思塞鴈
十年歸興憶鱸魚託身醫隱君謀妙委跡儒冠我計疎
何日相將歸故里翠微深處卜幽居

其二

龍岡走筆和清篇出示珠璣寄湛然字古意新看不足
挑燈寒雨夜無眠

其三

摩撫瘡痍正似醫微君孰肯拯時危萬金良策悟明主
厚德深仁四海施

和李世榮韻

異同誰定據俯仰且隨緣居士難聯句梅軒却解禪無
雲皆皓月何處不青天話到忘言處迢迢夜不眠

和景賢十首

龍岡居士得賢君聞道賢君增所聞
節操鸛雛捐鼠餌風神野鶴立鷄羣
只知輔嗣能談易誰識相如善屬文
擬欲贊君言不盡區區微意見詩云

其二

天下奇才鄭使君清名不使世人聞
五車書笥獨窮理三峽詞源迥出羣
未得開懷重話舊常思抵足共論文
自從一識龍岡老餘子紛紛不足云

其三

一聖龍飛敢擇君嗟予潦倒尚無聞蒼生未識鴻鵠志
皓首甘遊麋鹿羣黃雀已歸奚望報彩禽飛去不能文
龍岡特慰孤窮悶時有新詩報我云

其四

試和新詩寄鄭君無顏談道不聞聞治心更索捐中道
養性渾如鞭後羣玄語諄諄非是說真書歷歷不關文
儒生束教嫌虛誕得意忘言孔子云

其五

文章自愧不如君敢以玄言瀆所聞
有道居塵何異俗無心入獸不驚羣
重玄消息無多子半紙功名直幾文
回首死生猶是幻自餘何足更云云

其六

韻換

十年不遇一相知怡識龍岡恨見遲
常愛箕山能洗耳何堪鄰舍傲顰眉
榮枯貴賤難逃數用舍行藏自有時
心事紛紛無處說援毫閒和景賢詩

其七

感事

萬里西來過月氏，初離故國思遲遲。
人情慚愧三鬚面，世態梳粧半額眉。
田上野夫空歎鳳，澤邊漁父不傷時。
龍岡本具英雄眼，幾倩東風寄我詩。

其八

讀唐史有感

林甫滔天聖不知，三郎深恨識卿遲。
塵中妃子春羅襪，錢上開元指甲眉。
七夕殿中祈巧夜，三秋原上摘瓜時。
長天忽見飛來鴈，垂淚空吟李嶠詩。

其九

李楊相繼領台司
兵起漁陽禍已遲
向昔正憐花解語
而今空憶柳如眉
心傷桃李初開夜
腸斷梧桐半落時
試問宮中誰第一
三郎猶記謫仙詩

其十

往來寒暑暗推移
下手修行猶太遲
迷後徒勞常捏目
悟來何必更揚眉
宗門淘汰宜窮理
道眼因緣貴識時
祇為龍岡心猛利
湛然剛寫不言詩

又一首

龍岡醫隱本知機，薰蕕同盤辨者稀。
廊廟虛名無意戀，林泉夙願與心違。
羨君綽綽有餘裕，笑我皇皇無所歸。
尚憶當年垂釣處，一江煙雨靜霏霏。

和王君玉韻

王孫蒙饋飯靈輒，未扶輪自笑孤窮。
客誰憐衰病身黃，沙萬餘里白髮一孀親。
腸斷山城月徘徊，照遠人。

過東勝用先君文獻公韻二首

荒城瀟灑枕長河古寺碑文半滅磨青塚路遙人去少
黑山寒重鴈來多正愁曉雪氷生硯不忿西風葉墜柯
偶憶先君舊遊處潜然不奈此情何

其二

依然千里舊山河事改時移隨變磨巢許家風烏可少
蕭曹勲業未為多可傷陵變須耕海不待碁終已爛柯
翻手榮枯成底事不如歸去入無何

過夏國新安縣

時丁亥九月望也

昔年今日渡松關

西域陰山有松關

車馬崎嶇行路難瀚海潮

噴千浪白

一作十里雪

天山風吼萬林丹氣當霜降十分爽

月比中秋一倍寒回首三秋如一夢夢中不覺到新安

過青塚用先君文獻公韻

漢室空成一土丘至今仍未雪前羞

一作可惜水姿瘞古丘佳人猶自夢

羞中不禁出塞陟沙磧最恨臨軒辭冕旒幽怨半和青塚

月閒雲常鎖黑河秋滔滔天塹東流水不盡明妃萬古

愁

過青塚次賈搏霄韻

當年遺恨嘆昭君玉貌冰膚染塞塵邊塞未安嬪侮虜
朝廷何事拜功臣朝雲鴈唳天山外殘日猿悲黑水濱
十里東風青塚道落花猶似漢宮春

其二

延壽丹青本誑君和親猶未斂邊塵穹廬自恨嬪戎主
泉壤相逢愧漢臣玉骨已消青塚底香魂猶遶黑河濱
愁雲暗鎖天山路野草閒花也怨春

再用韻以美搏霄之德

去歲雲川始見君澄澄胸次淨無塵斗南第一珪璋士
冀北無雙柱石臣

公領帥
職故云

萬頃雲松斜谷外千竿水竹

渭河濱他年歸隱重相訪無影林間別有春

再用韻自歎行藏

箕裘家世忝先君慚愧飄蕭兩鬢塵自古山河歸聖主
從今廊廟棄愚臣常思臥隱雲鄉外肯徼行吟澤國濱
驛使不來人已老江南誰寄一枝春

再用前韻感古

宣尼名教本尊君
賊子常干犯蹕塵
鹿失羸秦無令主
鼎分炎漢有能臣
宋朝南渡尤天水
遼室東傾罪海濱
回首興亡都莫問
不如沈醉覓頭春

再用韻唱玄

重玄不惜說知君
又恐重添眼裏塵
臨濟唱中分主客
洞山言下辨君臣
持鈴普化搖空裏
垂釣華亭沒水濱
勘破這般閒伎倆
鐵林花發却前春

過雲川和劉正叔韻

西域風塵汗漫遊十年辛負舊漁舟曾觀八陣雲奔速
親見三川席卷收煙鎖居延蘇子恨雲埋青塚漢家羞
深思籬下西風醉誰羨班超萬里侯

過雲中和張伯堅韻

一掃氐羌破吐渾羣雄悉入北朝吞自憐西域十年客
誰識東丹八葉孫射虎將軍皆建節龍飛天子未更元
我慚才畧非良器封禪書成不敢言

過雲中和張仲先韻

致主澤民本不難言輕無用愧偷安十年潦倒功何在
三徑荒涼盟已寒宮下藏名思傳說林間談道謁豐干
挂冠神武當歸去自有夔龍輔可汗

過雲中和王正夫韻

白雪陽春寡和音誰人解聽沒絃琴詩書事業真堪笑
刀筆功名未可欽不信西天三步遠焉知東海一杯深
元來佛法無多子何必嵩山謁少林

過白登和李正之韻

十年淪落困邊城今日龍鍾返帝京
運拙不須求富貴時危何處取功名
騰驤誰識孫陽驥俊逸深思支遁鷹
客裏逢君贈佳句知音相見眼偏明

過天城和靳澤民韻

西征扈從過龍庭誤得東州浪播名
琴阮因緣真有味詩書事業拙謀生
咄嗟興廢悲三嘆倏忽榮枯夢一驚
何日解官歸舊隱滿園松菊小菴清

過武川贈僕散令人

班姬流落到而今聞道翻身入道林
歌扇舞裙忘舊業藥爐經卷新吟
眠白晝三杯醉靜對青松一曲琴
更看他年棲隱處蓬山樓閣五雲深

過燕京和陳秀玉韻

回首親朋半土丘嗟予十稔浪西遊
半生兵革慵開眼一紙功名暗點頭
下士笑予謀計拙至人知我謂心憂
再行不憚風沙惡鶴跡雲蹤任去留

其二

君恩猶未報山丘自笑遐方汗漫遊客過玉關驚白髮
要遊金谷覓蒼頭冷官待罪予為歟陋巷居貧君不憂
猶望道行澤四海敢辭沙漠久淹留

其三

孤死曾聞尚首丘悲予去國十年遊崑崙碧聳日落處
渤澥西傾天盡頭君子云亡真可恨斯文將喪是吾憂
尚期晚節回天意隱忍龍庭且強留

其四

餘生不得樂林丘，猶憶丁年選勝遊。
幾帙殘編聊快眼，一張衲被且蒙頭。
貔貅已報西門役，柱石猶懷東顧憂。
自料荒疎成棄物，菟裘歸計乞封留。

其五

空驚滄海變陵丘，白晝分明夢裏遊。
除妄楔邊重出楔，求真頭上更安頭。
亨通富貴剛生喜，苦惱悲愁強作憂。
斫斷葛藤閒伎倆，繫驢橛子不須留。

還燕京題披雲樓和諸士大夫韻

閒上披雲第一重
離離禾黍漢家宮
窗開青瑣招晴色
簾捲銀鉤揖曉風
好夢安排詩句裏
閒愁分付酒杯中
靜思二十年間事
聚散悲歡一夢同

和威寧珍上人韻

十載西遊志已灰
南征又自大梁迴
扶持佛日慚無力
贊翊皇風愧不才
舊約未能林下去
新詩常寄日邊來
何時杖屨煙霞裏
一笑伸眉得共陪

和李德脩韻

明明聖主萬邦君神武雕弓挽六鈞時有逸人遊闕下
更無騷客弔江濱衣冠師古乘殷輅歷日隨時建夏寅
厚德深仁施萬世巍然一代典謨新



湛然居士集卷三

欽定四庫全書

集部

湛然居士集卷

四至七

詳校官中書_臣沈鵬

主事_臣呂雲棟覆勘

總校官編修_臣王燕緒

校對官編修_臣沈應培

謄錄監生_臣

李國興

欽定四庫全書

湛然居士集卷四

元 耶律楚材 撰

和呂飛卿韻

舊說飛卿詞翰全風神
渾似晉名賢吟詩校子三十里
押韻輸君一著先
筆迹查牙森似戟
詞源浩汗注如川
好詩好字獨予得
准備攜將帝里傳

再用韻贈國華

學道宗儒難兩全湛然深許國華賢儒門已悟如心恕
道藏能窮象帝先似海詞源涵萬水如鯨飲量吸長川
而今一識君侯面始信清名不浪傳

謝飛卿飯

一鞭羸馬渡天山偶到雲川暫解鞍獨守空房方丈穩
更無薄酒一杯殘詩書半蠹絕來客釜甑生塵笑冷官

賴有覺非

飛卿道號

憐野拙長鬚為我饋盤飧

再用韻紀西遊事

河中

西域尋恩子城西
遼目為河中府

花木蔽春山爛賞東風縱寶

鞍留得晚瓜過臘半藏來秋果到春殘親嘗杞欒寧
論價自釀蒲萄不納官常嘆不才還有幸滯留遐域
得佳食

再用韻贈搏霄

以搏霄戒肉罷鷹
犬故以是詩美之

凜凜風神白玉山罷遊鷹犬逞金鞍瑤琴高掛幺絃絕
犧易頻翻斷簡殘息念如僧還有髮忘形見客似無官
伽陀誦罷爐薰冷一鉢疏羹當曉食

再用韻謝非熊召飫

行盡遐陬萬里山十年飄泊困征鞍
春風燕語歸心切夜月猿啼客夢殘
聖世因時行夏正愚臣嗜數媿春官
誰知賢帥開青眼掃洒西菴召我飡

再用韻唱玄

藤條擊破鐵圍山倒跨白牛不韉鞍
講疏僧歸經卷亂坐禪人起佛燈殘
為學未必如為道選佛從教勝選官
百事湛然都不念祇知渴飲與飢飡

再用韻

雲山疊疊復雲山瘦馬蘆鞭矮面鞍瀚海去程千驛遠
揚州歸夢五更殘塵緣淡處應忘世逸興濃時好解官
二頃良田何必覓春山笋蕨亦供飡

和搏霄韻代水陸疏文因其韻為十詩

資生無畏濟人深便見能仁六度心塵世捐財矜苦厄
寒林洒飯拔幽沉既臨巨海鈎神物試叩洪鐘伺好音
今日湛然攀舊例珠纓休惜掛祇林

其二

新朝威德感人深
渴望雲霓四海心
東夏再降烽火滅
西門一戰塞煙沉
顯觀頒朔施仁政
竚待更元布德音
好放湛然雲水去
廟堂英俊政如林

其三

論道西菴愛慕深
推誠片片露丹心
瑤琴莫撫相如引
寶鼎休焚韓壽沉
花氣渾如三角串
松風全似五絃音
清談終日忘歸思
不覺昏鴉噪晚林

其四

五派分流道愈深塵中誰識本來心
穿心土椀元無漏
沒底膠船却不沉
山色水光呈妙相
鳥啼猿嘯露圓音

雲霞活計無求飽
何事狂童作肉林

狂童一作獨夫

其五

前生未了妄緣深
薄宦相縈負夙心
只見淵明能印棄
誰知居士解舟沉
窮通榮辱皆真夢
毀譽稱譏盡假音
中隱冷官閒況味
歸心無日不山林

其六

居士才微學未深
靜思寧不媿中心
難忘北海千鐘酒
虛負西菴一炷沉
綺語效顰賡險韻
瑤琴學步鼓純音
此番公案休拈出
祇恐相傳入笑林

其七

新詩款玉起予深
獨有搏霄我許心
真迹居塵聊俯仰
高名與世任浮沉
同成雅會清茶話
共賞枯桐白雪音
他日歸休約何處
燕山叅謁萬松林

其八

賢帥文章蘊藉深雲川傾蓋便同心
掀髯談道檠燈爈抵足論文塞月沉
有眼句中君得意無絃琴上我知音
沉舟誤捉波中月莫學當年李翰林

其九

浪迹西遊歲月深臨風誰識湛然心
斯文將喪儒風歇真智難明佛日沉
佳茗暫嘗轟雪浪正聲聊作鼓雷音
年來逸興十分切準備求真入道林

其十

漁磯舊隱荻花深
塵世寧忘昔日心
兩岸清風單舸穩
滿江明月一鉤沉
飢來煮稻無兼味
醉後鳴榔笑五音
閒卧煙蓑春夢斷
不知潮起沒青林

寄賈搏霄乞馬乳

天馬西來釀玉漿
革囊傾處酒微香
長沙莫吝西江水
文舉休空北海觴
淺白痛思瓊液冷
微甘酷愛蔗漿涼
茂陵要洒塵心渴
願得朝朝賜我嘗

謝馬乳復用韻二首

生涯簞食與壺漿空憶朝回衣惹香筆去餘才猶可賦
酒來多病不能觴松窗雨細琴書潤槐館風微枕簟涼
正與文君謀此渴長沙美湏送予嘗

其二

肉食從容飲酪漿羞酸滑膩更甘香革囊旋造逡巡酒
樺器頻傾漱澀觴觴解老飢能飽滿偏消煩渴變清涼
長沙嚴令君知否只許詩人合得嘗

贈搏霄筆

一札霜毫綴上枝管城家世出東涯

遼東筆

鋒端有口能

談景紙上無聲解寫詩免向江淹求彩筆莫學班氏棄
毛錐贈君聊助文房用賦就離騷寄我知

再用韻寄搏霄二首

玉立堂堂紫桂枝雲川中隱寓天涯風神蕭散能談道
格調清新解作詩鄙論我甘蒙醬

予作辨邪論搏霄嘗讀之

雄才

君已露囊錐澄澄胸次人誰識祇有清風明月知

其二

斫倒霜筠節外枝誰言法界有邊涯
筌蹄意盡閑周易脂粉情忘束話詩
去歲生涯猶說劍今年活計更捐錐
威音那畔真消息試問瞿曇也不知

再用韻別非熊

靈木垂芳桂兩枝非熊佳譽動西涯
倦聽琴阮嫌狂客飽看經書厭小詩
成德羨君垂竹帛虛名嗟我類刀錐
會難別易堪惆悵何日重來誰得知

愛子金柱索詩

文獻陰功絕比倫
昆蟲草木盡承恩
我為北闕十年客
汝是東丹九世孫
致主澤民宜務本
讀書學道好窮源
他時輔翼英雄主
珥筆承恩策萬言

贈賈非熊搏霄一首

二陸尊賢擅美聲
月評難弟亦難兄
西菴麈尾談三界
北觀攜琴論五行
休道酒仙無太白
須知詩伯有飛卿
奇人輻輳君門下
占斷西州好士名

和李振之二首

半紙功名未可呈，無心何處不安生。
十年滄海塵空起，百歲黃梁夢乍驚。
舊逕既荒松菊在，丹誠不變鬢髯更。
年來漸有昇平望，每恨栖雞半夜鳴。

其二

酷憶遙山寸碧呈，歸耕何日樂餘生。
蠅營得失都無念，狗苟榮枯總若驚。
客夢覺來家萬里，聲詩吟罷月三更。
冥鵬本有衝天志，直待三年再一鳴。

非熊兄弟餞予之燕再用振之韻

藝逢知己敢相呈幾夜論文喜氣生
筆陣我甘三舍退詩壇君使四筵驚
公初傾蓋冬將半予擬乘輶歲欲更
特與幽人助行色一聲寒角隔煙鳴

和連國華三首

歲月如流走兔烏求真可惜費功夫
深源到底忘根柢至道元來貴拙愚
真理不空宜具眼太虛無面莫添鬚
直須穩坐長安好切忌途中認畫圖

其二

安得長繩繫日烏天涯老却舊耕夫
林泉放曠輸君樂沙漠淹留笑我愚
虎戰每驚涉虎尾龍飛不得採龍鬚
文章畢竟成何事富貴元知不可圖

其三

月上南枝啼夜烏悲歌彈缺嘆征夫
愁邊逐日看周易夢裏隨風謁太愚
縱有征塵遮兩眼却無慚色上三鬚
真人已應千年運佇待河清再出圖

連國華錢予出天山因用韻

十年不得舞衣班一憶江南膽欲寒
黃犬候來秋自老白雲望斷信何難
軍中得句常橫槊客裏傷心每據鞍
遊子未歸情幾許天山風雪正漫漫

還燕和吳德明一首

紛紛世態眩榮華靜裏乾坤本不譁
琴阮生涯聊自適詩書事業更何加
但期聖德澤天下敢惜餘生寄海涯
可笑燕然舊遊客倚樓悲我客程賒

又和橙子梅韻

可笑人心自短長誰知箇事不囊藏化成橙子舌耽味
幻作梅英鼻覺香金鈿似真隨變滅冰魂元假却芬芳
唯心識破同根旨何必臨風再舉觴

和竹林一禪師韻

富貴無心羨五侯隨時俯仰浪西遊斷無事業流千古
靜看英雄混九州白雁縱傳遐域信黃華却負故園秋
蒼生未濟歸何益一見吾山一度羞

西菴上人住夏禁足以詩戲之

觸處無非選佛堂

一作都盧只是一禪牀

東風何處避春光郡人

無足克千界大地絕塵塞四方舉步踢翻滄海月轉身
踏破白雲鄉快須擊碎閒家具說與西菴笑一場

送韓浩然用馬朝卿韻

開懷樽俎笑談傾未暇論文君已行富貴塗亨渠易致
詩篇韻險我難賡已成傾蓋金蘭友安用沾襟兒女情
淮擬秋深迂歸騎一尊濁酒遠相迎

戊子喜雨用馬朝卿韻二首

酷暑炎炎正不禁一聲雷震醞輕陰
救回南畝十分旱
變作西郊三日霖
遍野桑疇青
幄密連天
麥壠綠雲深
王孫喜雨登樓宴
貫酒黃壚解帶金

其二

生死輪迴苦莫禁
不如學道惜分陰
船乘沒底聊相渡
雲出無心強作霖
不死鄉中靈草異
長生劫外紫雲深
茅山道士真堪笑
虛費工夫煉五金

戊子餞非熊仍以呂望磻溪圖為贈

昨夜白麻降日邊文章領袖遠朝天
遙思御座分香賜更想龍庭命席前
白面書生酬夙志黑頭邊帥領新權
非熊應笑非熊老八十猶然釣渭川

和宋子玉韻

勇將謀臣滿玉京吾儕袖手待昇平
荆榛至道常嗟我柱石中原豈捨卿
日下有人叨肉食雲中高士振詩鳴
思君興味如梅渴海印

子玉道號也

那能識此情

和李邦瑞韻二首

隴石奇才冠士林萬言良策起予深
澤民致主傾丹懇邀利沽名匪素心
我伴簿書無好思君陪風月有閒吟
他年共約林泉下茅屋松窗品正音

其二

謝君千里遠相尋傾蓋交歡氣義深
筆硯生涯一作書

鋤因緣

又作鐵石肝腸

無異志金蘭氣味本同心揮毫解賦登高句緩

軫能彈對竹琴此去鱗鴻知有便臨風無吝寄芳音

和邦瑞韻送奉使之江表

駟騎翩翩出玉京
金符一挿照人明
莫忘北闕龍飛志
要識南陬鳩舌情
布袖來朝無騎乘
錦衣歸去不徒行
昇仙橋畔增春色
郡守傳呼接長卿

和王正之韻

洪才碩德兩相宜
雅操真堪據鳳池
富貴未終隨夢變
功名何在值時危
奇辭解吐萬言策
敏思能吟七步詩
但倩東風輕着力
摩天鵬翼若雲垂

其二

自慚不解告嘉謀十載韜藏僻一隅
巨海洪深容棄物新朝寬厚用愚夫
亨時嘉會千年少聖主雄材萬代無
文物規模皆法古佇看明詔起真儒

其三

皇天輔德本無親樂道奚憂甑滿塵
道泰小人當屏斥時屯君子自經綸
浮雲富貴元千變昨夢繁華得幾春
遇不過兮昏是命吾儕休羨錦衣新

楞嚴經云生死涅槃都如昨夢

祝忘憂居士壽

酷似燕山賓十郎靈椿初老桂枝芳兩朝厚遇垂千稔
一日清名滿四方玉珮丁東照蘭省班衣搖曳悅萱堂
他年參到平常處便是長生不老鄉

蠟梅二首

越嶺仙姿迥異常洞庭春染六銖裳枝橫碧玉天然瘦
蕾破黃金分外香反笑素英渾淡抹却嫌紅艷太濃粧
臨風浥此薔薇露醉墨淋漓寄渺茫

其二

水姿夢裏慕姚黃
滴蠟凝酥別樣粧
生妬白紅太濃淡
懶施朱粉自芬芳
寒英深染薔薇露
冷艷微薰篤耨香
受用清絕恣吟遶
惜花一念未全忘

謝禪師

闕

公寄閣山紫玉

方外閒人天一隅
因風寄我紫雲腴
起予妙理欺歡伯
滌我枯腸壓酪奴
琥珀精神渾髣髴
葡萄滋味較錨銖
禪師遠棄桃源路
日日尋山摘此無

和鄭壽之韻

聖主龍飛日月新
微才參預股肱臣
民財已阜錢如水
驛騎長閒塞不塵
威鎮西陲輸定遠
宴開東閣慕平津
何時收拾琴書去
林下衣冠作舜民

寄沙井劉子春

寄語沙城老故人
別來贏得鬢邊塵
馬蹄踏破關中月
新句吟空河表春
名利相縈余有歎
琴書自樂子非貧
何時策杖君家去
再試淵明漉酒巾

和琴士苗蘭韻

徒步南來愛陸機
公餘邂逅似相期
高山韻吼千品木
流水聲號半夜陂
聖德宛如歌治化
南風猶似撫瘡痍
曲終聲散無人會
撩我高吟一首詩

和人韻二首

西域諸蕃古未知
來王遠過禹封畿
名山淮擬金泥檢
古塞無勞羽檄飛
世樂詎能敵靜樂
蓑衣到底勝朝衣
年來痛憶閭山景
月照茅亭水一圍

其二

干戈未斂我傷神
自恨虛名誤此身
否德詎能師百辟
微材安可步三辰
箕裘漫嘆青氊舊
勲業空驚白髮新
安得夔龍立廊廟
扶持堯舜濟斯民

和武川嚴亞之見寄

當年西域未知名
四海無人識晉卿
扈從鑾輿三萬里
謀謨鳳闕九重城
衣冠異域真余志
禮樂中原乃我榮
何日功成歸舊隱
五湖煙浪樂餘生

其二

亞之平水久馳名

亞之本絳陽人今寓居武川訓童為生

壯歲題橋慕長

卿厭世德風如偃草驚人詩價比連城功名未立不為
嫌仁義能行亦足榮此理幽微人不識莫言儒道拙謀
生

其三

今年又得亞之詩每嘆風雲會遇遲拙運且淹童子役
雄材宜作帝王師羨君筆下揮千字知子胸中蘊六奇

靜對西風和新句淒然南望動深思

其四

誤忝綸恩斗印懸之才羞到玉墀前
劾姦封事夢猶諍
許國忠誠老益堅
仁政發從天北畔
捷音來自海西邊
從今率土霑王化
禮樂車書共一天

其五

寥落龍沙寄此生
情鍾我輩豈無情
參商管鮑賢朋友
南北機雲好弟兄
蓮葉飄香思晚浦
梅花飛雪夢春城

故園日夜歸心切未濟斯民不敢行

已丑過雞鳴山

三年四度過雞鳴我僕徘徊馬倦登寂寞柴門空有舍
蕭條山寺靜無僧殘花濺淚千程別啼鳥傷心百感生
今古興亡都莫問窮廬高卧醉騰騰

寄天山周敬之

當年傾蓋識君初爛飲天山駐使車秋去安仁空有賦
雁來公瑾又無書林巒紅葉如人老籬落黃華亦我疎

為向天涯道岑寂強吟新句附雙魚

邦瑞乞訪親因用其韻

干戈擾擾戰交侵一紙安書直萬金
兄子生還愁未解萱堂仙去恨尤深
涕零倚木西風怨腸斷聞鈴夜雨淋
養老送終真有憾號天如割望雲心

和李邦瑞韻

趙老名言本兩忘庭前空有栢蒼蒼
西江吸盡慵開口北載添來亦括囊
明月清風何所礙落花流水不相妨

須知居士元無病底用千年舊藥方

湛然居士集卷四